

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 1204 del 04/05/2026

Von madjo fin in bimmat gevüarte pesüach, bèrkstattn un bizzschaftége trèff vor alle, zo darvéra di umbèlt vodar hoachebene

Natùr un edukatzióng vodar umbèlt in Museo Lusérn pittar biòloga Francesca Mor

[Cimbro] Dar Museo Lusérn stèllt vür in näuge summarprogramm boda ågeat dar natùr un dar edukatzióng vodar umbèlt, eppaz pensàrt zo nempra di khindar un di famildje dar zimbarne earde un soinen èkosistème pitt eppaz bodase drinnziage un boda sai vor alle.

Von madjo fin in bimmat 2026, di Francesca Mor, biòloga un umbèlt-vüararen, bart nãstian in alln in aktivitétn, redante vo biodiversitétn un vo bisa stian di vichar ummaz pinn åndar. Di stadjóng hatt ågeheft an sãntzta 2 von madjo, di 10.30, pittar frai vüarung vor eltarn un khindar pinn titl “Trèff vo nãmp”. Dise trèff, boda bartn soinn a bõtta affon månat vo madjo fin in bimmat, bartn soinn an momént vor alln zo darvéra meara vodar bizzschaft, von auzstèllungen vodar natùr un pitt tematische fokus, boda bèksln in anìaglan trèff: anfibie, paing, bölf, vögl un vil åndre.

Dòpo in groaz erfolg von 2025, bartma machan haür o di bèrkstattn vor di khindarn von 6 atti 12 djar, boda bartnse haltn in dritte sãntzta von månat vo madjo fin in herbestmånat di 10.30 in Museo. Durch praktische un lustege aktivitétn, berda nimp toal bart mang khennen bazta vorporget di natùr, pitt soinn roasan un vichar: Pittar “Misióng zo übarleba” sebar bida di vichar bèksln zo übarleba in di umbèlt un pitt “An tage vo piage” sebar bisa lem dise khlummane insèkte. Pittn trèff “Haüt flattartma” bartma mang khennen pezzar di vögl, bia sa lem un bazza tüan un pittn trèff “Di kraft von èlbarn un von gegés” bartma darvérn bia ’z tüanda di èlbar un ’z gegrés åzopazza dar umbèlt bo sa lem.

Zoa zo reda vodar umbèlt an sãntzta 13 von prachant, an sãntzta 18 von höbiat un an sãntzta 8 von snitt bartnse o haltn drai abas-trèff in setz von Kulturinstitut Lusérn. In earst trèff, boda bart hoazan “Untar dar roge”, bartma ren vo bia dar bõstriko iz nã zo macha bèksln ünsarne beldar. Balbaraz bartn vennen in höbiat, anvétze, barpar ren von pern, schaugante o å pittnãndar khurtze video. In månat vo snitt, pittn lest trèff boda bart hoazan “Nèt lai stille”, barpar süachan zo vorstiana bia ’z tüanda zo vorstianase di vögl von balt.

Pitt dise trèff o, dar Musèò Lusérn geat hërta vürsnen auzohalta da bizzkultùr un zo macha khennen pezzar da ünsar earde un di umbèlt bo bar lem alln in laüt un in khindarn boda zuarkhemmen.

Di bèrkstattn vor di khindar von 6 atti 12 djar bartnse haltn atz 16 von madjo, atz 20 von prachant, atz 18 von höbiat, atz 15 von snitt, atz 19 von herbestmånat un atz 17 von bimmat: zo nemma toal mochtmase innschraim un an eltarz mensch mocht nãkhemmen in khinn; ’z izta nicht z’zala. Atz 2 von madjo, atz 13 von prachant, atz 4 von höbiat, atz 8 von snitt, atz 5 von herbestmånat un atz 31 von bimmat bartnse haltn durchgevüarte trèff in musèò; vor dise o, zoa zo nemma toal, izta nicht z’zala.

Zo vorsa eppaz mearar atti trèff bodase bartn haltn un zo bizza bia zo tüana innzoschraibase, tüat gian atti websait www.lusern.it odar atti social von Musèò Lusérn; ma mage o schraim a mail att info@lusern.it odar årüavan in nummar 0464-789645.

Übersetzt von Kulturinstitut Lusérn

(eng)